

解文毅公集

墓表

墓誌銘

書



解文毅公集卷十二

墓表

翰林院修撰王欽止先生墓表

嗚呼功業既成而人推服之恩惠及人而人懷思之天下皆是也無功業而人推服無恩惠而人懷思古今天下之入甚少也若漢之賈誼唐之劉蕡其功業何所成恩惠何所及其文章亦甚少也然使人思而嘆息之至今推服之無異辭豈世之人惜俊才之夙成悲壯志之蚤謝歟抑憫其不遇於世而以窮死歟予友翰林修撰王君欽止諱良歿之日識者皆嘆息推服而懷思之其朋友哭之盡哀即未與接者亦聞而嘆息失聲此足見人心之公而行之孚於人者久也君少失父自知讀書為文其祖與畊先生治尚書學聞天下著書經管見藏於家矜式主意四書經疑貫通能發前人所未發兩漢詔誥咸梓於世君蓋其微為學愈勵而家事未嘗廢雖甚攻苦必親理之其母以君篤於孝君被病即告母曰我病且死幸有弟三人在我無足哀夭壽命也其母以為達於理言不及妻子此誠人情所難先是父歿時弟俱幼今得成立皆以

解文毅公集

卷十二

一



爲君篤於慈其族人親戚無間言皆以爲宗族稱
孝鄉黨稱弟方其在府學課試輒冠曹人不以爲
忌試江西鄉薦第一上親灑宸翰魁名天下賜進
士及第授翰林院修撰未幾設文史館待之晉秩
一等分類秘閣書目預修高廟實錄總集類要祁
寒盛暑終日不怠與胡廣等奏修時政記如故事
參酌攸當屢上書言當時切務上皆欣然納之飭
身正色不可狎玩聽其言侃侃如也然未嘗妄言
其所不可行自奉甚約調急如將不及與人交久
而益敬其行孚於人也類如此獨其於死生之際

從容安泰無毫髮可憐之色預與母訣斂手待終
予往視之一辭不亂此足以信其平生所蘊非淺
智之所能度者宜其感動衆人猶醴泉之浸不必
爲江河芝草之榮不必爲松柏而人信以爲祥洵
乎功業恩惠未嘗顯著而人重其生存哀其沒世
同於賈誼劉蕡也君文章雄偉光耀常曰悖於理
而工於辭者非不知理悖也欲希世而盜名也吾
切耻之詩詞古雅一以理爲主警策淵永字畫精
楷皆稱其爲人其稿若干卷藏於家皆可傳也君
連世與予家友善其伯祖吾素嘗爲館京師待我

先祖真我公後爲翰林編修國子博士卒於官家
君在太學爲之心喪以禮葬之其祖諱克耘與予
叔祖觀我求我同舉進士克耘號野耕元統癸酉
科甲授吉安府同永新州事其族父無將與予同
登洪武戊辰第君與予弟文夫己卯同舉於鄉知
其族行莫予若也是宜爲表而繫以辭刻之其墓
君爲吉水帶源王氏唐末由袁之白芒來其先太
原人也曾祖諱孟贈萬安縣尹祖妣曾氏贈宜人
父諱其尹避地吉安城中千戶宋以女孫女馬是
生君年十六母氏與歸帶源娶沙田劉氏戶部主
事芸庵先生之女子男三人瑩錚鏜墓在高嶺園
之原君生洪武戊申六月十五日歿辛巳九月七
日也天子命治其喪者其妻之姑夫顏君子明也
系之以詩

其辭曰頌修容兮內正直勇徃義兮不組飾少孤
立兮炳文章篤孝友兮譽彌芳超騰驤兮陟天路
希聖哲兮同軌度火始熾兮泉發蒙防讀墓兮遭
回風朋情鬱紆兮凜秋日高欲濟無梁兮逝水滔
滔華芝殞兮醴泉竭靈徵長兮旨芳歇彼力渺兮
任乖張循塗傾兮永懷傷賢不肖兮非彼天何壽

大兮樗櫟偏於呼欽止兮材行雖不施有遺思兮
無窮期

翰林院檢討廖君墓表

嗚呼余讀甘棠之詩而知古之人善政遺結於人
心久而益著愈遠而不忘也然豈多有哉予友廖
君敬先奉詔起修高皇帝實錄既至而事畢上曰
此老儒即以爲翰林檢討余退以告同官曾君曰
章王君汝玉梁君用行皆舉手加額曰昔吾縣之
父母也問之曰豈弟哉古人不是過也廖君卒於
官三君子哭之尤慟嗚呼好禮君子者或不恤小
解文毅公集 卷十二 四
人善撫微賤者或驕於士大夫方以在上者或好
諛而佞已爲守則易尉而爲尉則凌守也惟豈弟
者庶幾無是也豈不可稱偉人也哉廖君之爲縣
也其禮於士大夫君子可見矣其初爲丞懷慶之
河內地當西北之衝邑小事煩又當新附軍旅所
過供具浩穰縣令久闕積不治君時年尚少也不
數月政成郡守王興宗宿望老成然嚴難事大歎
獎以爲不可及縣清化鎮商稅多陷匿布政司官
來捕執其首爲奸狀事連千餘家徵逋鉅萬不能
足遂以委君君視百姓如家也區畫貧富相補不

數日足其所徵逋布政司官大善更置酒爲謝而去君考滿既垂髮戴白拜送道路多至垂涕者既至京師時方以蘇州爲難治而屬縣吳江尤號繁劇朝廷謂君及興宗俱有名也迺以興宗守蘇州而君丞吳江興宗遇劇務輒以委君君不得專治吳江也時有富民二氏以水決圩田事數年訟不已至聞朝廷下有司督其理屈者沈氏修廢圩岸幾數十里岸廢決已數年上下高深數十尺彌望水決無迹可求而沈氏又以富聞天下興宗謂使他人督之將爲其賄所溺事不集又煩朝廷遂以

語嘗他官他官亦皆恐懼莫敢往興宗大言曰宜莫如廖縣丞也君欣然往督其役爲之方法巧思出人意表如期而畢沈氏亦深德君惟拜謝而已不敢發一言君精敏絕倫吏抱文案叢雜手署口訣頃刻而畢令簿拱手歎服未嘗疾言遽色而使民皆不忍欺興宗值考滿當去老稚遮道去不得行君後坐爲人連累謫鳳陽河內吳江之民就視之背項相望於道其居者夜則焚香祝之爲之祈福人或問之曰君何以能得人心如此也曰吾不知也吾視百姓猶吾子耳嗚呼茲非但鼓舞有才

者之所能也君諱欽以字顯宋御史中丞剛之裔
七世祖謙字益仲受學於朱子之門仕爲吉水縣
尉因家於縣之東溪高祖彥翁曾祖季崇祖明德
世爲士父觀字觀民始居於鄉之雙峯下號退省
卓然獨行之君子也自言平生未嘗對俗人一飯
與子先君子交最好篤於教子積書至多君爲兒
時從先叔父刑部公學易君之弟敬存亦從學競
爽刑部公歎此廖氏雙明月珠也君又從羅如麈
先生受詩經名譽日起國初兄弟俱應江西進士
舉不中君召試京師優等歷仕南北聞見充拓詩
解文毅公集

卷十二

六

歌清麗而時發其竒雄文章典雅屢考試貢舉川
廣之人士莫不謂君爲藻鑑權衡也君之季弟敬
已剛介寡合特與予善而君諸子自勤自廉兄弟
嘗仕而休也予與黃季岳兄弟過其家焚香看圖
畫月明飲酒庭中徙倚竹樹下出浴溪水中行歌
相答及君奉詔復起以永樂元年拜翰林之命予
幸同官昕夕相見自勤復爲蜀府紀善來巧相值
談笑論舊頗仰頌臾而君遽以微疾不起萬古永
訣夫在常情如何其可悲也君自拜命以來既修
文獻大成日務纂書業而未就以二年四月朔得

戎寓會同館先是子齋宿與坐夜語其孫祖環侍側忽謂子曰是子聰敏可教惜吾恐不見其成立也迨四月十日夜遂歿享年六十有三妻王氏士族有懿德子男四人長自公省親於冀北道卒子嘗爲之作傳次自勤自廉自謹皆儒雅自勤英偉善談論知名當世自廉力學善爲詩五月得訃告即涉大水來迎君柩歸葬於鄉山之原且奉狀乞爲之表將刻石揭之其墓君有女適陳伯瑋胡方來有孫祖環祖田祖歸祖歡祖興世有庇賴也已於戲嘗聞君孝友篤至爲弟受罪自誣服感動獄

解文毅公集

卷十二

七

吏爲之垂涕泣天子初見時問所經見即以民疾苦對故能膺天子寵眷其卒也遣醫勞問歎息之而吾黨之士皆痛惜之他日史館官不傳之孝友必傳之循吏也

麟板藍先生墓表

高皇帝建都察院專治刑獄藍公子貞及詹徽爲都御使未幾徽專任而子貞左遷漳州推官高皇帝慰諭而遣之幾月而漳州獄空屬縣南靖爲山賊焚劫而縣以民反聞軍衛將出兵屠之公力請止單騎臨視得其狀白免獲全數萬人公既沒十

有餘年而其子曰省請予表其墓嗚呼是非直道
陰德故耶其世系百行翰林胡公光大銘已詳不
復贅爲之詩俾讀而歌思之詩曰

藍君中山自唐家吉宋季勤王連端帝室烈烈文
山忠貫日月研席深交矢死鉞鉞有孫萬宇是曰
瑞軒義質早凋篤慶後昆顯赫麟極瑞軒元孫少
失怙恃克由仁義慈訓成之祖母王氏而亦盛宗
澤流無紀天假續之迪其敏聰洞究經旨旁博經
史夕惕惟寅不慕青紫弱冠遇亂扶攜奔竄主於
仁里橫經講貫賊不忍兵幾至化成匹休古史善
解文毅公集 卷十二 八

效有微天朝洽一歸安其家蓋衍其學金輝丹華
三微七辟詔書旁午翻然振志教於大府撫民奕
奕靡有親炙教成浩歸茲欲敘迹初志弗成高皇
特旨召擢重官朝綱以理進退從容識邪與正天
語丁寧海濱用靖隱德所覃活者數萬卓然不磨
有讀毋慢

章江劉先生墓表

吉水章江劉先生既歿之後十有七年其孫宗平
爲翰林檢討將刻石爲揭於其墓之原俾後之學
有所考也縉之家學傳於東山楊先生靜春劉先

生四傳而至元季太父伯中公諱觀仲正公諱蒙
又講於吳文正公慨然有得精思力踐所至門人
弟子麇至而從之乃建學舍於里東山之下四方
之人畢集六十年間零落殆盡矣獨章江劉先生
肥遯邱園志行純篤師表一時教人不倦實無愧
於道學君子也蓋其平生未嘗發一非禮之言妻
郭氏死時年三十誓終身不再娶或微諷之輒曰
有子足矣鰥居四十年如一日讀書絕欲一榻蕭
然君子咸以爲難少時學易冬不附爐夏不揮扇
造次顛沛書冊未嘗去手奉親避亂所至遇盜賊
解文毅公集 卷十二 九

不忍肆害皆曰此劉孝子也其誠敬之積自有感
動人者如此洪武辛亥有司強舉至京師以曠辭
題杜門不出門人子孫受學者教之宗平夜誦習
諸經史性命道德之說亦自誦以助其勤每至達
旦因命爲縣學生曰其以行吾所學焉爾必勉之
性不嗜酒曰自聖人以下稍過即能亂德鄉人亦
多化之有出傲言者或曰章江先生聞之得毋掩
耳乎其人輒自慙先生諱珣字道章學者稱章江
先生生延祐丁巳七月沒洪武某年月日年七十
二子男一人諱同山泉先生以其子妻之克肖儀

刑嗣有隱德孫男二長宗平也名均次老壽先生
家世榮顯本京師人自唐游宦吉之安福宋季居
於吉水之金灘其諱通者六世祖也諱立仁其高
祖也曾祖潛字淵甫宋進士大庾簿尉備關嘗立
戰功祖元字仲元大庾君故饒財仗義建義塾於
吉水古城延四方學者聘湏溪劉先生為之師仲
元為高座弟子元初時未弱冠按察使辟為掾捧
檄巡捕活永豐湖西民千餘家遷章貢司征調吉
水攝縣令而邑大治日以其暇講學於衡齋周先
生心遠聶先生古澗曾先生介軒劉先生靖軒夏
解文毅公集

卷十二

十

先生奎峰梁先生高祖莊山公故造詣高明辭官
卒業因自金灘徙居於吉水古城之東季太父伯
中其子壻也父仕先學於余家累世為同門相師
友聞之過庭之訓莫不推先生醇儒也嗚呼考其
師友之淵源如此踐履篤實如此又何必嘐嘐然
有道學之虛名也哉

西山劉先生墓表

古稱鄉先生沒而祭於社祭之何也教施於俊良
俗成於長厚仁義所漸禍亂不作法施於民則祀
之祀之宜也故西山劉先生子彭始歿而人悲之

既久而益思之所至祭祀之固宜也矧其子弟門人狀其行欲表之以誌不朽余可得而辭哉按狀先生壯年敏英家門儒貴素性雄豪不解窮促言論鋒發辭義卓然鄉多儒者歲時過從囊出其文字上下頡頏其門如市及丁亂從祖趙州公舉宗奮義日夜戰其鄉闔門多戰死子彰亦幸而不死隱憂致病晚益羸喘洪武庚申以賢良徵詣京師骨立竒悚遂以得還遇喘時或坐以達旦嗚嗚然諷詠書冊不離手與疾忘苦洪武戊辰縣官聘迎之訓導於學鄉人始得見古人師弟子之禮其病

卧於家弟子羸糧景從拜牀下受請指畫皆不逾時貢於鄉舉於監丙子之秋一日子方坐其館座上
上有報曰趙哲先生徒也舉在前列先生之力也
衆賓客闐然走賀人擁先生行過哲家哲父殷勤謝又報曰劉宗平先生徒也舉在前列先生之功也則又簇擁先生行過宗平家宗平父殷勤謝又報曰先生令子迪哲前在試操筆疾書即投卷嚮蚤出漫不加省迺徑得捷轉相賀先生先生扶杖接拜踞轉歎息曰吾恃弟子與子將圖佚老爲朝夕之養一旦及門輒欲之官去老者何所復望哉

既而歎曰吾負荷先人遺業守經術以崇正闢異
病且死不敢蕪其勤以淑於人今幸而有子若弟
子將施於世死不恨矣未幾遂歿時洪武丁丑二
月二十五日也然則雖如古人釋奠可也非祭於
社而已也先生家吉之泰和宋初徙吉水文昌夏
郎高祖新民宋寶祐進士曾祖實翁元貢進士號
竹坪先生伯祖震字伯振元進士朝列大夫知趙
州世稱蒼筤先生祖庚達號竹西先生家君外舅
也父諱鳳字孟敬至正貢士母張氏公生十三年
而孤事母孝趙州公及叔父貢士君鶴舉教之甚
解文毅公集 卷十二 十一

篤先是人稱夏郎劉氏治尚書有名雖歐歛八世
家傳殆弗能過元盛時王克耘等皆出其門今惟
先生得其奧以力行天性嚴與人義建祠修譜親
親恩厚白首不渝有四書要覽文集若干藏於家
生至順壬申十月二十七日享年六十有六娶顏
氏進士顏成子之女子男一人迪哲也名桓葬先
生於沃塘山之原子爲表其墓

蕭君師文墓表

宋丞相信國文公兵敗於吉之空坑也有石大如
數間屋忽然自山頂震落當路徑元兵望而大驚

稍却丞相由是得脫去鄒鳳輩以餘兵拒戰死傷塗地父子兄弟相勗冒白刃不少却時吉水倚富蕭文琬父子督饋餉亦在是役幸而不死退而筆記是日事甚詳予獲見之可羨哉吾鄉之多忠義也而今宋史迺無之傳云丞相空坑之戰得趙孟潏給元兵以免而已蓋宋史作於元盛時故於丞相事特誣陋至云丞相求為黃冠等語欺罔尤甚顧豈足為丞相輕重哉然恐相襲訛謬不可不辨也文琬南唐御史大夫儼之後倚富之墟儼之墓在馬文琬上距儼十世家世節義本其風流文信解文毅公集

卷十二

七

公嘗大書餘慶堂以勗之文琬生獻可獻可生季章季章生德祥字元佐皆忠厚人也元佐生天祐字師文元季傾貲奮義保障其鄉鄉道官軍舉宗血戰賊望其旌而靡元參知政事全子仁承制授主簿不拜時里有劇賊擁衆數萬師文宗族梗其喉牙賊不勝憤圖掘其先墓以逞師文與之苦戰賊勢益熾師文恐不免即自取墓中遺骸身負之出走藏匿還與官軍合勢大破之其忠義節孝類如此誠有光於文琬常恨不得主帥如文信公者與之一死光明俊偉可書也不然師文豈在鄒鳳

輩下哉惜乎守吉安者纔一梁克中尚完城數年
師文等不爲無力也及天兵南來師文不忍賈勇
謝散其徒遣弟師賢率壯士從寧河王鄧愈破熊
天瑞於贛亦奉身歸第口不言功子因蕭氏重有
感於吉士多忠義又重有感於宋史之謬也考之
元史又獨著全子仁傳而梁克中無之豈知子仁
極不足道驕淫不事事無智畧其死爲人所逼非
得已者謬得美名不如梁克中更不如蕭氏兄弟
也而隱顯若此可勝嘆哉師文容貌儒者直諒敦
實家富累千金一門三世同產百餘口飲食衣服
一出公帑庭無間言撫兄弟之孤逾於已出未嘗
一飯無賓客每食前方丈考鐘鼓大飲高會連日
夜人不以爲侈遠宗貧鄉人媮恤之備至其卒於
外而子扶櫬以歸弔哭之聲震天嗚呼何必附青
雲之士哉吾知其施於後世矣其母彭氏配李氏
子士益字世用繼室張氏子士秀字世選士柔字
時徽孫茂實英聲海濤顛乾震其生元延祐丁巳
八月沒洪武辛酉二月葬里溪陵之原前誌奉議
大夫刑部郎中蕭公用初作今爲表特加詳焉則
按士柔所爲狀也士柔好學善爲詩少時常與之

登倚富諸山臨瀧江之上想師文兄弟之高風英
傑豪偉之氣尚凌厲於烟雲落照間可激昂而興
慕故爲之表而不辭也系之以詩曰
溪陵有原青烟盤盤其瘞璠璣采雲團團瀧江之
濱華第嶙峋昔有英傑今其子孫食德之長林惕
露霜有此蘭蕙接其榮光義烈軒天九族蒙恩於
戲百世式象其賢

宗瑞周君墓表

先外大父封州高使君元之名臣居鄉恂恂未嘗
騎乘時時與本立周君游蓋亦恬淡之士也元季
解文毅公集 卷一 二 五
之亂本立之子宗祥舉義兵爲保障先君還自元
都往來其間嘗與余言宗祥善待士慷慨豪舉有
光其先世其弟宗瑞恂恂謹飭教授其家恬淡如
其父也余生也晚皆不及與之游獨嘗親於艾元
輝先生與語其家之詳也蓋先生嘗主其家其家
子弟皆從學宗祥兄弟所以事先生者洞洞屬屬
然庶幾古之人宗祥之沒也先生誌其壙示予讀
之焉厥後因過其家與其子弟宴飲追思而考論
其遺爲之倚茂樹臨清流裊裊者久之今年宗瑞
之子吾復奉子友胡君敬方所爲宗瑞行述一通

不遠千里至京師請爲之表將鏡石立於其墓之
原嗚呼使一家一鄉斯世至於後世皆慕如宗瑞
兄弟也何古人風俗之不可復哉蓋奔競於名利
者世之大患而風俗之所由薄也胡君之稱宗祥
之舉義兵也屹然爲鄉保障遠近被兵者輻輳於
其里及宗瑞之門皆篤意教之衣食不給者就館
穀之每有所廉讓調恤不爲矜色不爲德容兄弟
克盡友恭宗祥一飯盃酒宗瑞不在不舉也且兵
亂數十年後至於今始復承平之舊比比皆然獨
其兄弟所居醪橋數十年不被兵燹民物安堵自
解文毅公集 卷十二 二六

周君宗祥墓表

君諱監字宗祥吉水醪橋人祖原善父本立皆篤
厚隱約君少有智識父甚竒之曰振吾門者此兒
也稍長內外承迎罔有違闕元季之亂一市人皆
求請君爲保障君與子吾文誓衆爲義兵不蹈非
禮皆挈家引却東山下以伺賊覺賊果焚醪橋縱

擄掠君之子率衆逐人人皆奮以一當百賊大敗走衆志既定爲營水陸以應官兵時吉安守臣梁克中治水軍於大州大喜賚以白金綵幣俄以功陞吉水州判官甲午歲饑告糴於軍門得粟以賑所活甚衆隣邑之居民避賊者扶老攜幼來依庇君君撫納之如將不及有山寨致重貲請其仇家將甘心焉君答之加贈黃金委曲諭解之其人釋然愧謝爲家塾訓其子弟延先生親執禮甚恭世方搶攘弦誦之聲不絕由是名士皆喜過之性尤喜接賓客久而益虔歲時歡宴必盡醉乃已與弟

宗瑞最相友愛今天兵南來君以兵屬其子從征賴還亦辭營歸養君晚歲安健子孫滿前同堂而食庭無間言先公歸自元都時與梁克中協謀守吉往來醪橋常主宗祥家父子尤相敬愛家君每爲予言而予生也晚皆不及與之游而嘗過其門識其後進子弟撫其手植庭砌之木皆已蒼然可念名園臺榭依然尚存門俯碧流之水毫髮可鑑而其旁有廟丹青漫漶君之題字猶在壁間想其冠蓋之都賓客之盛而君之平生志意豈不樂哉君生皇慶壬子七月十日沒以洪武辛酉五月十

五日享年七十娶陳氏能勤儉內助子男四人吾
文吾忠吾信吾敏孫男十三人其墓在里大塘之
原請爲之表者其孫宜哲也

幼道許君墓表

吉水俗尚世家親戚朋友交游雖經亂廢其父兄
相與教詔其子弟子弟相與奉養其父兄若同堂
一姓先君子爲言若大父與如愚黃先生明德夏
先生山梧許先生相講習予與曰攷夏君茂明許
君皆從游曰攷舉進士先得名其所對救荒策山
梧之所宿構也三四年夏氏黃氏已成古人獨山
解文毅公集 卷十二 十八
梧有賢子孫今幼道茂明之子也元末之亂予在
元都若大父死節祖母寓於水西黃氏許氏相庇
後予客洪州陳友諒破城人傳言予已物故茂明
事若祖母盡禮是雖吾鄉俗尚之厚若許氏其尤
賢者歟幼道少淳敏好義甚有父風若所當友也
縉識之不忘後先君子學於環洲幼道時寓婦翁
家其婦劉氏賢內助也善承夫志才能綜理內外
肅然下至臧獲動必由義先君子每至其家飲食
供具必旨以潔先君子亦必爲之盡禮語予曰其
家刑于之化內行整齊亦可師法者也縉又識之

不忘自是與幼道往還間語及亂事蓋幼道生三年而遇壬辰之變長於流離奔竄之日而卓然自立如成人未嘗逐兒童嬉戲每寇至避匿輒抱其故書冊人或嗤之曰金玉不足寶此先祖之遺何可棄也茂明入國朝仕爲武鄉令以卒幼道事親盡孝每率其家人雞鳴而起力踐古人之禮家人化之亦不以爲異也居喪有聞人以許孝子稱之性慷慨輕財好施尤厚於交友或有急難委曲周旋不避危害死無所歸者輒爲收葬聞訃則爲位哭奠之洪武戊寅以明經舉分教武學學在虎踞

關上其下臨大江諸生每去後蕭然如萬山中人
有不堪寂寥者一日大雪予往訪之時已晚張燈
煮茶武臣子弟稍稍來待以酒果進與共賦談論
達旦觀其意氣無不滿於心者予又益自歎先君
子知人之明而幼道果能不以外物動其中爲可
師法也間嘗有親戚之喪與俱送葬於國南門之
鳳臺里幼道慨然太息謂旅葬者有子孫不能歸
骨此何等忍人嗚呼孰知幼道以永樂二年正月
竟客死虎踞關而亦旅葬於茲耶幼道有子清好
學能世其家將舉其喪歸葬於鄉環洲之原故爲

之表而係以詩白

慷慨許君高誼薄雲緩急可倚信義是視事親以
孝可以成教弟子恂恂革其軼驚君敏好學長於
議論抵壁揮金未嘗顧吝生不慕富死不怨貧其
藏其密永利嗣人

家處士元琛墓表

處士雁門解氏諱琛字元琛淵靜先生諱泰之子
萬安學正浩軒先生之孫宋太學進士莊山先生
之曾孫也連三世不顯仕而隱德益厚處士君曾
祖縉紳之高大父也高大父諸孫顯者亦多矣處

解文毅公集

卷十二

二

士君年纔四十六以卒而素志亦在於隱豈非種
而不食有慕於莊山先生者與處士生至元之已
卯沒洪武甲子縉紳時尚少覩淵靜與王夫人哭
之哀也淵靜時年七十餘矣衰麻白髮弔者皆悲
痛縉紳有以知處士之能友也君之沒至今二十
有四年矣君三男皆學爲士而長曰約字簡夫尤
工文章耽隱如君狀君之數千言俾爲之表刻於
墓嗚呼君之臨沒也王夫人問何言但曰恨爲子
不終簡夫從學淵靜未能文章如今之所爲狀也
今淵靜之沒亦二十年簡夫又改葬君又能述君

之羣行圖不朽也淵靜之哀與君之恨寧不可以少慰乎狀曰君少從伯父觀我求我學時二父已歎其穎敏十四遇亂侍親避居於鄉之高源未嘗廢學冠而及門之徒如雨愚夫豎子皆有啓悟其鄉人至今懷之與弟元章相友出入必偕昕夕講學怡如也弟疾病扶掖之湯藥必親弟沒抱尸泣三日泪盡繼以血友愛如此郡縣交薦辟之諸兄元溥元魁元震元祿皆出而仕君歎曰父母老矣賢弟亡矣諸兄又皆出而仕矣吾可復爲利祿而離吾二親耶乃衣短褐黃冠走匿於鄉之韓相山

解文毅公集

卷十二

五

之陰久之爲小屋以居每三日一至親舍皆戴星往來惟恐有記其姓名者躬耕治園圃讀書自娛雖蔬菓熟未獻二親不敢先嘗登山臨流徜徉詠詠治經不惑傳註訓詁以踐履爲先爲文口占腹藁不以示人世好紛華澹然無所嗜狀所稱如此嗚呼非可謂之篤實君子與若簡夫非謂善言德行孝而能文者與君之配比隣江氏名家有行與君同志庶幾古所稱老萊之妻者君次子縑質夫三子紹彬夫君之墓在鄉之東營山之原詩曰

惟門解氏遷廬陵自唐於茲七百齡所希隱德多

顯榮有種斯獲前可徵處士後將莫與京起視韓
相山崢嶸

鑑湖阡表

解氏鴈門人自唐家吉已七百餘年至封王封公
德盛顯極矣篤於先公其學以主敬爲本戒慎恐
懼終身未嘗有一息之間然慷慨英雄料事如神
對衆吐辭賢愚屏息歐陽文公嘗指謂先曾大父
曰他日高年盛德之豪傑也果如其言羣雄皆知
敬愛所在不敢兵有所斷議衆不能違晚遇高皇
帝待以前朝遺老召與極論元事甚善其對既而

解文毅公集

卷十一

三

曰國初何不仕對曰國初以二弟事陛下今以二
子事陛下上慰諭歎息時敕臣縉奉家書上覽屢
與吏部尚書李原名翰林學士劉三吾語而稱之
縉嘗宴見必問及安否至起居細事縉被特恩得
歲一歸省卒許終養時洪武辛未五月也後四年
復召以長子綸侍還公感恩邵德篤敬而誠於是
已八十有四矣公治五經皆有師授書易得之家
傳講於竹坪劉先生始授春秋於如愚黃先生至
正初入太學講於吾素王先生元慶毛先生學禮
於太古熊先生少時學詩於申齋桂隱二劉先生

後益爲古文辭詩歌師事黃文獻公揭文安公卒
業於楚國大司徒歐陽文公之門代爲文辭書札
楚公自不能辨公第闔年二十與公同日胄監監
舉公第一闔聯得舉二解聲名卓然出數千上
將會試中書而亂作矣公倉皇南歸乘單舸經賊
中數千里至吉時至正甲午南北音問久絕吉安
守臣梁準克中等至欲散去公亟往見之克中大
哭拜不能起公正色責之曰我自京師單舸南來
所過人聞朝夕皆能拱手送迎王師百萬至矣大
夫行且受賞歸朝何至悲啼自沮克矍然起謝因
解文毅公集

卷十二

重

求計策公爲之移書招附羣雄及他郡邑賴以完
保十餘年歲戊戌公移書陳友諒弟勸其殺僞主
以歸元而友諒謀稱帝公因之南昌南昌爲元守
甚堅友諒急攻拔南昌公不得已奔還與義士劉
明道等拒之於吉水其僞將熊天瑞也雅知公斂
兵去攻陷吉安遂上據贛公徃說之因陳友定以
歸元友定時遣江伯昂至以朝廷宣敕啗天瑞既
許諾伯昂去而天瑞猶豫持兩端公歸吉與義士
孫本立等謀殺友諒僞官以應友定而本立等以
附本朝海道使者復至自閩以先祖死節贈官以

參知政事宣授公辭不拜使者委致而去公遂遁迹山中國初以賢良徵至京師懇辭明年戊申始克還癸丑復被徵至江西以疾免歸確乎廉分淡乎聲利家法嚴如朝廷忠孝成於天性以父死王事時隔在萬里忌日每臨悲慕摧絕間居深念終身未嘗正席而坐母徐夫人故宋遺老林隱先生之女習經史性嚴毅公事之亂離生無一日拂其志歿無一日忘乎哀平生師友故人徧於天下寄之以死托以孤遺盡心竭力未嘗自伐其勞未嘗有怨於人度量之宏偉如也爲文根柢六經渾雄

解文毅公集

卷十二

書

自恣若降時雨若決江河讀之使人快意爲詩雖在亂離絕無憔悴窮蹙之態會文切理洞中事機每酒酣樂作得意笑歌座客盡傾其浩然之氣可謂壯哉洪武辛未五月初吉上詔臣父於華蓋殿曰是子大才其以歸教訓十年而用之不幸洪武戊寅五月十日乙酉高后賓天是歲十一月二十三日乙未先臣捐館遭讒竄逐泣血萬里幾欲無生今歲庚辰十月始得歸葬先人於所居之鑑湖阡從治命也嗚呼少承君父之教報之罔極言之痛心謹叙次族行表揭於阡先公解氏先世居雁

門唐天寶中始祖諱隱子德遠諱禹父子皆進士
隱仕爲蘄州司戶參軍禹爲吉州刺史遇安史之
亂家吉文水西臻善里在今吉文水西跡符南山
之麓生宏材諱幹爲左武衛兵曹參軍生得輿諱
駟號真白處士生兼善諱從美咸通中舉進士兼
善生世隆諱盛唐季之亂始遷於吉之寨里世隆
生舉謨諱弼舉謨生麗正諱文榮麗正生伯軻諱
希孟舉進士爲濮州知錄參軍事嘉祐乙亥奉父
隱居於鹽嶺之鑑湖上濮州生世維諱持國以三
舍法陞仕臨江軍新淦尉世維生慶邁諱千齡號
解文毅公集

卷十二

五

文江文江生敬之諱黃敬之生邦卿諱必達邦卿
生子春諱谷淳祐漕貢進士漕貢生昭子諱夢斗
號莊山太學生太學子辰叟諱應辰號辰峰元胤
試貢士永豐教諭臨川學正瑞州路儒學教授永
豐縣簿致仕先公大父也先大父字真我諱子元
號竹梧至正乙酉進士得便道養親仕爲安福州
判官遷太史院校書郎授承務郎東莞縣尹元季
死節於鄉有贈官祀於忠節祠大母徐氏里中林
隱先生之竹林隱啟家有知監再世深德其助先
公少從大父學後又徧受業於經師有體有用在

朝在野諸公俱罷重之至正甲午以先祖死節事
聞歸吉討賊時南方已大亂吉安城守梁克中等
至欲散去公始爲言朝廷德意宣諭禍福衆皆信
之城守復完然以母老常避依義居入國朝遂遁
迹山中歲丁未徵詣辭還縣令費公震師事公國
初建學攝鄉校後縣令李公恒甫廉有治聲事公
尤謹作興士類公力居多歲癸丑以賢良徵復辭
歸前此嘗主考廣東江西湖廣鄉試稱甄拔得人
洪武戊辰二子聯中甲科高廟數稱公善教每有
家書至必取視嘉歎辛未入朝賜坐勞問有楮幣
之賜以臣縉侍還甲戌入朝以臣綸侍還先公亘
古之豪傑也魁岸山立威儀襜整音吐虹暢議論
英偉昌言萬衆之中賢不肖皆爲悚息剛毅廉儉
一木榻三十年土屋漏穿布衣蔬食顏如渥丹下
待僮僕其中肅肅其外頤頤然蓋生平以敬爲主
胸中暢豁無纖芥凝滯其自視如光風霽月人望
如秋霜高岳此本乎性篤乎學而發見乎外者如
此嗚呼今尚得而瞻依之哉公諱開字開先生元
皇慶壬子二月七日之亥終明洪武三十一年十
一月二十三日之辰葬鑑湖上初娶劉氏繼黃氏

無子繼高氏先妣太夫人也子男三人綸大經綱
及紀縉大紳女二人一適廬陵彭某一適黃金華
孫男莊春廣春山呼婁金孫女長適東溪彭懷次
適桑園周恂次適城南藍謚次適蕭肇敏次適周
光華建文二年歲次庚辰十月朔越十有六日男
翰林待詔縉表

翰林修撰眷姪王良填諱

先妣高太夫人鑑湖阡

解氏鴈門人唐至德初肇家於吉至今七百年餘
世有賢內助先妣高太夫人諱妙瑩字淑婉高氏

解文毅公集

卷十一

三七

自南平至崇文裔孫逸為吉州判官因家焉曾祖
龍光字申甫宋漕貢進士學者稱草窓先生祖願
賢亦大儒學者稱守忠先生以子貴贈同知泰和
州事考諱若鳳字在翁學者稱灞雪先生至治辛
酉進士朝列大夫知封州母周氏故宋進士周路
鈐公孫進士知天河縣諱以仁公女家法嚴整累
贈渤海郡太夫人封州公以大定乙丑判建昌太
夫人生於解舍后歷官南昌南安平江常迎泰和
公就養太夫人亦從太夫人封州公第四女也最
鍾愛勤儉不驕寬柔能泰孝惠靈承出於天性時

方尚隆盛奢僭相仍才夫人獨尚簡整羅綺朱鉛俱不屑盼多聞卓識封州公每致歎焉嘗入室見黃金數餅即避出戶去不問封州公素廉有德之者致文綺數篋闕無人委之而去太夫人見不顧讀書自若自經史傳記天文地理醫藥之書皆能論析善小楷嚴正森密封州公每擇象犀金龍筆墨文牋賜之曉音律算數間作歌詩輒棄縵紵製衣裳織繡麻縷女工之事無不敏妙嘗同女兄弟繡高王經象施於蘇之天王堂觀者填溢所至婦女婉而師之至正壬辰四月兄鏗鉅舉義兵母周解文毅公集

卷十二

五

太夫人卒於戰艦五月先祖太史公諱子元兵敗為賊所執大罵死之先二日封州公在廣攻龍潭賊中流矢卒於軍事聞於朝使者由海道追贈推誠盡節功臣資德大夫中書右丞子金銓師逾年城陷死之贈推忠效節功臣榮祿大夫江西等處行中書省平章政事至正癸巳鉅提兵復吉水與賊戰於鄉兵敗為賊所殺吉州震駭家屬流離太夫人喪葬無違禮泣涕不食肉者逾三年其事父母及姑叱咤之聲不至犬馬未嘗出一惡言先祖妣徐太夫人最號嚴事終其身未嘗拂其顏色事

先公義以順相敬如賓不妄言笑嘗曰婦有長舌
維厲之階豈惟婦人多言多敗人莫不然性不嗜
飲嘗曰先姑有言婦人嗜酒決非貞良汝曹戒之
豈惟婦人家之敗子鮮不由茲其制諸飲食菜果
醢醢之屬皆簡便有法著酒食議若干卷女德評
若干卷高文海死節事一卷文海即鉅也避難徒
適無寧歲料機脫禍陟險履危沉毅鎮安不形愠
喜往往出人意表縉兄綸亂離無書太夫人諳寫
孝經論語古文杜詩教之縉自能言時蚤夜訓以
敬身維持文墨不離其側未嘗令同兒童嬉戲爲

解文毅公集

卷十二

无

言宋元來政治民事記及日時無所遺謬又言封
州公至孝於父母周太夫人善事其舅姑故封州
公兒女自幼時不聞相詈周太夫人念勝子同於
已出太夫人友之過於已同產由是篤於慈愛子
孫六七歲猶不免於懷温言善道無幾微呵怒見
於顏面諸孫多視如母克盡其孝焉至其賑窮賙
急如將不及待恤孤嫠提攜盡誠極愛人無間言
每歲多病不廢盥櫛衣履褻易唾涕棄置必於屏
處敬終如始不以富貴患難有渝天性然也臨終
時謂縉兄弟曰死者人所不免吾年七十餘子孫

滿前過吾父母兄弟矣但當與汝曹永訣不得不
悲耳因泣數行下家人盡泣太夫人復止之曰死
猶枯株生意不貫漠然氣離魂無不之魄如遺矣
奠送物備於亡者何益金玉珠貝尤非所宜本出
私愛反成竒禍吾經離亂所見多矣葬我必依近
地素衾結髦朴棺深穴斯可矣聚家人與訣端坐
而逝嗚呼痛哉時洪武三十年丁丑十二月二十
七日之戌也享年七十有三生乙丑十月十日之
辰時三男綸綱縉一女適廬陵彭某孫男五莊奉
廣春山呼仍壽慶壽女孫七人皆在室葬所居鑑
解文毅公集

卷十二

三

湖從治命也永樂四年歲次丙戌六月朔越十有
二日男翰林學士兼右春坊大學士縉表

解文毅公集卷十三

墓誌銘

吏部尚書陳公墓誌銘

余奉詔纂修太祖實錄觀自歲癸卯戡定陳氏彭蠡之戰至動星象衆庶咸見而四方豪傑之士雲合響應幅輳而爭趨之雖湯武之得士未能過是何其盛哉至歲甲辰即王位而浙江取次平若廣信陳公修太祖所尤眷注者也是以首擢理官講畫律令崇寬厚而省繁苛復倫要而黜姑息光明正大四方翕然知有一統之制作由此始焉繼而及以爲兵刑政治之大者也唐世府兵之制稍爲近古而未精密乃擢公兵部郎中其所以任將帥養士卒得內外相維之體兵農相資之意遂爲萬世之法而公之昭顯成德益以著焉太祖初即位山東新附念濟南重經王氏之亂民墜塗炭尤甚大將多練兵屯田其間非公莫可治也遂擢濟南知府居二年而政成太祖嘉之以天官六曹之長而明經習制建官均職惟公是宜擢拜吏部尚書引據古典參酌時宜審地劇易制事繁簡貴賤疎數遠近寬嚴課功覈實賞錫黜陟之類皆公啟之

未幾卒於位繼之者莫能移易也余嘗謂太祖之治天下也其事有緒而若素定於畎畝之中誠所謂天授之者而一時勳舊臣才碩道全經文緯武皆非近世之所能髣髴其一二者於戲盛哉今尚書公之歿四十餘年始得其子九成爲之狀求爲之刻詞於石按狀陳氏自彬始有聞於信之弋陽生應龍應龍生文光號南隱贈迪功郎生萬理字德甫號梅澗任信州路歷山長教授贈黃巖州知州生三子曰誼字天驥曰敏學字志仲號亦梅官至平江路總管府治中曰宏宇任遠蔭韶州路乳源縣主簿公之父也母張氏公生至正辛酉九月十九日沒洪武辛亥七月十三日享年五十有一夫人楊氏今年九十餘公歿二年九成奉母隱居於桂徙南寧今家於貴縣之郭門有子三人曰鏞曰銘曰鐸鏞之子璉銘之子瓚鐸之子璫爲之銘

曰

廣信之山龍虎鬱盤弋陽九華連峰巒岿篤生偉人逢時經綸悉所宜歸乘運躍鱗聖人好生明刑飭法與定章條惟有欽恤制兵之宜因仍歷世當農講武經久無弊山東初下兵民雜居朱幡皂蓋

往來撫綏暮年政成歸掌銓衡平均四海位冠六
卿我抽石室用纂六經敬服德業副其聲稱著之
簡冊復爲此銘邦家之光閭里之榮

戶部尚書郁公墓誌銘

永樂三年八月五日戶部尚書郁公薨於位上遣
官祭以文命工曹具視輟朝一日顧翰林學士臣
縉等歎息稱其才嗚呼公之哀榮始終固可美國
家所以待臣庶恩禮之厚充足以激勸於當世公
之子孫豈不永有庇賴歟於是其子彬衰麻踵門
泣而致公之治命請予銘其墓噫公與予交二十

解文毅公集

卷十三

三

年未嘗爾汝褻狎亦未嘗挾長殺敬禮予二人者
亦自信爲誠實洪武二十二年予侍講華蓋殿中
公始受命爲戶部度支主事賜名新明年轉戶部
司屬十二年陞北平部郎中二十四年六月起授
嘉議大夫戶部右侍郎考滿上於庭中稱譽擢尚
書授資善大夫十三年於茲矣非負天下才而能
之乎抑公之盛福其祖考以來積累之慶非偶然
而致也公家素饒財慷慨豪舉不爲齷齪喜賓客
樂於賑貧乏不爲德也洪武中奏事廷中被顧閭
天下戶口漕運地理險易計數時日應機響答無

遺謬共謂劉晏以下不踰也晚歲多疾乃時在告
上甚憐之公亦時語予曰吾覺衰老恐旦暮先朝
露不能報國恩吾平生無卓異惟君知也幸與之
銘其墓紀其榮遇而已嗚呼公非可謂達人歟公
蘇人也曾祖仲和祖瑜父德字銘本公以至正丙
戌正月十四日生於吳縣洪武元年祖父遷居鳳
陽臨淮縣公隨家焉夫人嚴氏綜理家政嚴而有
紀彬字孟文亦克孝敬公嘗屬予曰他日視彬曰
余故人之子誼猶已子也墓在臨淮古城之原銘

曰

解文毅公集

卷十三

四

古大司徒職惇典禮馴擾兆民豈惟會計惟公奮
身亦以愷弟恂恂休休爵祿之罷歷官有年光榮
後先豈曰其才有得於天豈無人謀不如盛福崇
崇其阡臨淮其麓

國子祭酒徐公墓誌銘

永樂四年春翰林修撰徐公旭被命為考試官無
疾而卒上聞悼惜為文祭之勅賜棺歛送之如故
事先是公以眷屬從仕者十餘年不家食念先墓
祠弗飭子年十八行冠禮而速之歸傍無童僕與
公友者迭為喪主受弔祭連旬乃已京師之人莫

不艷公以爲榮益知聖主所意嚮而儒者之所爲
實且重也公素有盛名其爲吏考功也綜覈名實
是非非殺最嚴甚棘棘不阿人視其面莫敢發
言干以私者以故天下咸曰徐考功而被黜者頗
惡之然亦莫敢謗也予嘗與修太祖實錄及纂書
禁中又見公之學問文章過於其所設施者而考
功之名蹟又其毫芒也於是翰林鄒侍講仲熙授
以公門生修撰吳溥所爲行狀稱公字孟昭少穎
敏而沉默有高志年十四從鄉先生蔡深淵仲受
春秋學即通大義能屬文爲族父所竒重洪武乙
丑登進士第爲浙江巡行監察御史入禮科爲給
事直日記註太祖欲老其才而用之命分教房山
丁父憂治喪有聞服闋授鳳翔教諭考河南鄉試
入朝告歸省其母時母已疾病公倍道兼行至家
母病忽愈後數日卒人以爲孝感服闋爲安王紀
善詔求直言公條上六事皆切當於時用薦爲知
州入史館考試禮部貢士時稱得人復上書言事
當路忌之故除考功員外以爲迂濶將不任事不
知極卓卓樹名如此何其知公者少也聖上即位
擢公郎中與修實錄成擢朝列大夫國子祭酒同

僚以事中之調叅議雲南陞辭上留居翰林廼以
史館修撰纂書禁中爲副總裁遂以此終嗚呼他
人雖不能知公不悅公者亦衆而聖天子深知之
所以恩榮終始爲儒者之至榮也使公有年聖天
子所以任之豈但如是已哉狀又稱公性方嚴善
固守不爲流俗所移學問亦非世之務爲博洽者
比文章贍而雅居家在官盡職無所詭隨訓諸生
皆有成就尤喜薦士所引拔甚多皆知名當時周
人之急如將不及疾病艱危能爲盡力皆信而不
誣者也予嘗爲公銘其季父之墓知其世居南昌

五代之際有諱宗部者始居饒之樂平宗部之後
十七世孫諱式者建樓藏書以教子弟鄉人號曰
書樓徐氏又五世至應麟登宋淳佑進士第公之
高祖也曾祖竒夫太學上舍生祖松友考公明皆
業儒不仕妣江氏公娶某氏子男二人女一人所
爲文集若干卷藏於家公年五十有二將以某月
日葬某鄉某山之原嗚呼公之世德又如此而纔
及中壽子未有聞天之報施其不有所待耶銘曰
巖巖徐公面目水兢兢不撓庸俗驚巖巖辭直氣矜
不爭謹論屢叩天子廷有疾畏之莫敢輕保全終

始天威靈思文服義多友生萬世不辱太史銘

監察御史陳公仲述墓誌銘

公諱繼先字仲述姓陳氏其先金陵人也十八世祖暉始居吉之泰和族盛至數十人業儒多宦達鄉族無與爲比有諱先得者學行純正號菊存先生元初爲贛州路儒學教授致仕以子貴贈萬安縣尹公之高祖也菊存生學禮仕至贛州路推官致仕公之曾祖也推官生以道潮州路儒學教授公之祖也教授二子長曰有慶即公之父也公生元至正庚寅四月三日推官晝而假寐夢神人持

解文毅公集

卷十三

七

一皂纛豎其聽事前寤而生公推官大異之曰必亢吾宗稍長穎悟異常兒七歲善屬對教授先卒推官鍾愛之未幾遇亂推官沒家益貧困公撫稱弟獨與母蕭氏居姑之壻劉崧憐而教之學通詩經而又肆其力於古文隆寒盛暑手不釋卷庶幾貧而樂者也以郡學生登洪武乙丑進士第明年擢山西道監察御史調山東道出按治山西福建聲光赫然小民與士大夫之賢者皆愛慕之還調廣東道決獄稱平勤事不怠一時章疏奏覈多出其手暇則爲文自娛求者甚衆亦不拒之四方名

士識與不識皆稱陳古文而不名自來京師夫人
曾氏留家養母獨居舍一榻蕭然亭無童侍疏食
飲水十年如一日往來書問至家幾百餘紙無一
語及利私洪武癸酉六月二十一日歿於官歿之
日橐無餘貲篋無完衣廩無餘粟餘書數冊而已
聞者莫不悲之曾氏同里人紹有先生之女亦能
甘於窮約子一人曰賞永樂元年以春秋舉其鄉
今年會試黜於有司蒙恩得還鄉里廼持其翰林
修撰梁潛所爲公行狀請予銘嗚呼悲哉予少時
家兄大經歸自府學得公所爲文家君讀而稱之

解文毅公集

卷十三

八

曰故家有子孫後又得公庭對策讀之益加羨慕
後官京師始與公相識同朝者幾四年往來情好
甚篤公廣顙隆準面目巖峻身若不勝衣而言論
確然人皆謂誠端士藹乎其可親介乎其不可干
以私也吾往年已嘗爲公銘忽夢見公以爲未足
以得公之詳而公亦未葬也今公之子賞始克葬
公龍門山之原而賞之篤實又甚似公余又慶公
之有子也乃悉按狀而爲之銘曰

有偉陳公出於名宗休祥先徵譽望益崇鄉稱碩
族爲名進士爲才御史傳以文字籍湜之徒可參

翱翔擬倫絜矩公有剛鉉龍河如池山石如砥有
銘斯阡有頌無已

翰林藍君日省墓誌銘

永樂四年春天下士會試南宮狀出囂然稱屈聖
天子臨軒覆試副榜三百三十有一人余友藍君
勗中第二名特賜冠帶同進士及第入翰林爲庶
吉士又四年授典籍欲其盡識中秘書聖天子意
甚盛也勗亦自感激又三年卒於官其兄紹永遣
其子猷扶櫬歸葬於歐鄉羅富之原且爲狀與其
嫡子繼昌踵門求余銘嗚呼余忍爲銘哉君自少

解文毅公集

卷十三

九

從予內兄子章劉先生學朝夕相見當覆試余爲
讀卷官去年相見飲酒慰勞甚歡而何意未朞年
而遂銘君之墓耶君字日省與予友劉日昇生同
年月日時皆洪武壬子十一月二十日之亥予去
年歸日昇卒銘其墓今年歸日省卒又銘其墓皆
余平生之知己也余安得而不痛傷也日昇卒時
日省尚無恙也術者相視嘆以爲不驗今竟若是
豈其術者可信耶而以君之才志氣而止於是耶

銘曰

藍系中山自唐居吉頤頤文儒世有仕籍君家顯

考為都御史君少而孤御史賢子母陳來歸二子
三女繼昌弟雷既喪其母升猷從子鞠育孝誼伯
兄述狀浪然隕涕里閭有表墓門刻辭蒼蒼山木
雲物昭茲

元邵武路同知蕭公墓誌銘

元之季世天下四分五裂其間盜名字者無慮千
百計獨閩之陳友定起徒步至列將相百戰守死
為元東南烈士未能或之先也當是時吾鄉豪傑
多從之崎嶇嶺海之死不怨朝廷音問實藉以通
先祖太師公真我死節事聞贈官先君子亦授資
解文毅公集 卷十三 十

德大夫叅知政事詔使來自海上友定遣江君伯
昂與俱來且說熊天瑞於贛伯昂與先公少相善
也且言友定之意先公感激邀里中蕭克欽輩數
人俱至贛說熊天瑞天瑞猶豫先公以太夫人老
病不能行伯昂去報命克欽南逾嶺表間入閩崎
嶇兩浙出金陵轉巴蜀還寓長沙歷湘潭以歸與
先公謀曰吾觀羣豪智略獨友定忠義殆可倚也
迺復之閩友定承制授克欽奉議大夫同知邵武
路叅其軍事友定用法嚴往往致濫輒為營謀全
活甚衆嘗引兵擊賊建陽山谷間卒遇千餘人圍

數重君執長刀躍馬奮擊賊首兩人直前來刺將
及忽大呼辟易其衆曰且止且止此吾父蕭君也
使詰之二人跪曰我嘗見獲於陳公賴君救之得
生今雖衆寡不敵我終不敢背德陣稍却羅拜而
去按治建寧光澤道中有七十人者執兵而前跪
曰生我者公也每思無以為報今幸道經我里敢
以白金百兩為從者獻蕭君不識也其人各言姓
名及所以營解再生之狀君慰諭却其獻而去洪
武九年隨友定至京友定死君以親老辭不仕歸
田里年纔四十二事親以孝聞讀書教子自娛初

寒盛暑手不釋卷閭里親戚子弟從學多所造就
洪武戊寅六月四日終於家享年七十二嗚呼可
謂全名盛福矣君生元大定之丁卯纔歲餘母艾
氏卒繼母王氏鞠之愛逾已出岐嶷不凡將冠受
書於安成羅先生學成教授於鄉卓然以不墜家
聲為念而所以去就卒如此可謂難矣予嘗聞先
公欲為傳其事不果今令子翰林檢討引高與子
同修高皇帝實錄見友定之事而歎蕭君之不可
作也引高亦感泣奉狀請銘予不敢辭按狀公諱
寅克欽其字所為文章曰舫中集晚自謂舫中叟

學者稱秋舫先生其先世居山東有諱忠國者仕
宋高宗爲吉州防禦使子文仲贅吉水城西張氏
子孫遂爲吉水人高祖典簿公文布曾祖信可祖
德永父雲心皆世積忠厚姻連仕族君娶艾氏繼
娶王氏涂氏子男五人仲高奎高次引高馮高持
高皆能世其家女三人適仕族孫男十四人曾孫
男三人以壽終之歲葬君於邑之仁壽鄉落塘山
之原銘曰

有偉蕭君世之通儒縱觀四方識其睿愚得所宜
居之死不回從容進退鐘鼎若違蔬食之甘韋布
之温天錫壽祉有賢子孫毀譽之真身後迺定盍
視厥家惟善無競

清河丞徐君伯權墓誌銘

前年從父原復丞華容爲言國初侍兄原震爲令
清河丞得鄱陽徐君伯權而進賢吳君庸爲簿三
人相得甚協恭圖治其民至今追思之遇夜共讀
書爲詩歌文章飲酒相樂言不及毫髮私昵剛濟
其柔今則徐君已歿吳公在嶺南而伯兄家居不
相聞者久一念及之未嘗不爲之慨然太息也今
吾又去爲丞將以徐君爲法不知令若簿有若吳

君之與伯兄乎若有之華容之政將必有可觀而
民將思之也從父之言如此時予未及細詢徐君
行事今年君之子奉君之從弟考功郎中旭所狀
行來請銘噫予所願爲也夫何敢辭按狀君諱恕
伯權其字也幼穎敏六歲知務學受詩於絅齋先
生一試鄉校輒魁元季寇陷樂平以鄉兵數千來
會官軍復之帥第其功當授官辭不拜國初洪武
庚戌以明經薦於鄉明年得仕臨清縣丞水陸之
會地劇而民貧方大亂之後中山徐武寧王宿重
兵居守君周旋上下與之贊劃教民禮讓招撫流
亡中雪寃滯至捐俸勸分以業窮困興學校期年
化洽調清河縣視臨清爲有加踰二年以疾卒於
京師嗚呼丞固難於令者也君所遇之難又如此
所致迺如此漢有循良吏豈足多哉惜乎未見其
止也君生名家少從先生長者充其格物致知之
學故雖天文地理醫藥武經衆技之說莫不旁通
曲暢以輔翼仁義不流迂濶嘗從世父處謙行道
中遇仇人結衆狙擊之君奮挺大呼其衆駭散有
族人酗酒屢加以橫逆順受未嘗一反其唇孝慈
睦族又如此其自少年時一呼殄寇復其鄉邑有

功而不伐庶幾仁者之勇豈不深可惜哉君嘗自謂抱膝山人晚號釣雲翁文章有奇氣凡若干卷藏於家生元泰定丙寅六月十九日歿以洪武乙卯四月二十九日娶某氏子男二人同高騰縣丞珠初仕爲學官今爲嘉興府照磨其先自五季世始家樂平高祖剛顯祖公達父處信母顧氏里之塔山君之墓也銘曰

仲勤吳先生墓誌銘

洪武丙辰先君子之友胡延平卒於官仲勤吳先

解文毅公集

卷十三

十四

生延平之妻兄也來經營葬事予從先君子識之胡延平家見其英邁不羣甚敬服之先君子曰小子未見孟勤先生世稱吳氏二鳳是其兄弟子請問其詳則曰先是華樂先生與而祖同時倡義兵而祖不幸殞於兵華樂亦賁志以歿其時孟勤兄弟年皆弱冠負文武才數以策干城守者皆不能用後悉如其言父與子皆豪傑之士也又曰元盛時江右詩人自范文正公揭文安公而下流於委靡獨擅音節而不失其雄渾者華樂父子其尤也去之十餘年爲洪武丁卯始及拜先生於家得聞

餘論慊其平生明年先生復之楚又後十餘年侍
先生於史館痛先君子之不復作每授教爲之興
感先生亦念故人之子愈加愛厚未幾而先生蒙
恩得散地以佚其勞遂以捐館聞予追平昔集次
先生寄予書大篇短章詞藻溢目老成忠厚之情
及引教之意不覺其感愴之至也欲爲先生述傳
而先生之子善存以庶子胡君光大所爲行狀一
通求爲之銘胡君延平之子先生之甥也知先生
家世羣行爲尤詳謹按狀爲銘先生諱勤字仲勤
其先大梁吳氏徙居於荆至諱某者宦南康子孫
居廬山之陽宋淳化間有曰某者爲永新簿因家
焉曾祖原道妣某氏祖文振妣李氏父師尹字莘
樂學者稱爲桂山先生終永豐丞先生幼而敏悟
初學語時能識錢文上字人皆異之十七八爲文
章詞藻天發歲癸卯太祖皇帝兵下吉安叅謀郭
子章有詩名一見談論歡如平生即署爲泰和令
以親辭洪武初徵天下名儒試中書堂第一人太
祖欲作興儒學特除武昌儒學教授其化大行復
以例免歸楚王致書幣迎爲世子郡王師蜀王及
湘獻王交致書問深相敬慕永樂元年與修太祖

實錄特除開封儒學教授周王侍以賓禮世子獨
愛重之以永樂三年二月戊辰日卒於官距生元
至順庚午八月某日享年七十有六明年善存以
其喪歸葬於某山之原孺人蕭氏善治內事先十
年卒子一人善存也一女適胡直先生晚居安福
善存今爲安福人孫男某先生學極該博手未嘗
釋卷老而不倦爲文章詩歌敏而甚工善行楷書
在史館時年七十餘矣運筆如飛天性孝友事繼
母尤謹待姊盡其敬撫猶子極其慈接物平恕而
賢否甚明善飲酒遇賓客故人傾倒達旦軒髯議
論襟懷洞如也嘗念其先舍南康故曰匡山樵者
居武昌曰黃鶴山樵晚更號由翁皆以名其文集
并六藝集若干卷藏於家銘曰
豪傑之才該博之學剛大之氣壯而不遇時老而
不大施其所自著足以傳世煜然其光不可秘

夏侯時雨先生墓誌銘

於戲飄風雖驟不能以陰雨揚其塵蛟龍雖神不
能以白日離其倫博碩餘裕德文之士雖賢不能
自必於用雖用不能自必於顯通此所以多鬱迴
轅軻而卒以困終也古稱文人相輕余識交天下

士道其鄉先生文儒紛教誇譽角起究不可一差
豁然不足啼獨山東豪傑文武士與吾鄉雋庸人
一口說夏侯先生霽學行山海可仰於書無不讀
讀皆通通則慮慮得善取予服守篤踐以教人無
毫髮倦髦且益孳以故人皆悅從弟子進者先後
數十百人而波其賸者蓋不知幾許矣又疑遠其
風度不拘急若束縛者霞絢瑾玉宴笑因事誘論
尤傾動其座人歆懌忱化不自知覺夷險艱通不
爲憂豫泰如也家居時年八十餘皓髯髮儼衣
冠温然不怒甚可愛敬此衆人所告予也今年春

有儒者養直手文字一通大戚邑邑若有求請者
謁入且言則先生冢孫狀其族來請銘也嗚呼子
生二十餘年聞先生名十餘年矣且職在紀善惡
敢辭銘按狀先生字時佐鄉稱時雨先生生元至
大庚戌七月二十二日戌時歿於洪武庚午十一
月二十七日辰時葬鄉之西車井頭配張氏繼
室劉氏子四人銓長文華應華又鑑劉氏出也女
二俱適人矣孫男四曰源曰温曰淳曰泓者即養
直也銘曰

粵稽夏侯萌蘖於譙喬遷長沙爰吉是僑瀘水之

滋顯衍孔昭代有卓傑在唐曰韶歷宋逮元暨於
昌朝兩有文武擁旗珥貂蟬聯有耀激其清霄倚
嗟先生含華在朝腴郁孔周窺規如姚一命司教
吉士惟杓再命臨川撫民不怵河潤膏施星輝岳
莒金精失馭卷懷軼超邁於熙和嬉於德輶齋魯
大邦仰之喬喬自南自北感若聆箭允也君子士
林之翹人誰不死公有賢子子肖孫哲億年未死
我述斯銘以昭新阡從祖公友炳有舊文公未通
顯而克長賢賢者孔多晦一炳千潛德有耀卿雲
在天刻辭有泐斯文永傳匪文則傳世教不刊

莘雲歐陽先生墓誌銘

歐陽文忠公十六世孫諱衡字師尹學者稱莘雲
先生至正舉進士遇亂遂不復仕吉安守臣梁克
中檄舉義旗先生即遣子率豪傑千餘人首治水
軍與賊戰摧其鋒屢建勞績竟死於陣先生以書
萬言陳便宜主將不能用先生曰事不可爲矣隱
居山谷間時四方大亂尚有學者義而從游先生
不拒也入國朝屢有薦者嘗再至江西行中書省
皆以疾辭與先公同年生而月日稍後兄事先公
先公之應詔赴闕也曰吾必不仕將以死自誓子

幼無可托者此可少念耳先生即許以子妻子兄
謂先公勿憂也已而先公亦得告還人皆謂先生
友誼無愧古人先生於書無所不讀讀無不記雖
山經地志稗官小說醫藥之術皆通析融會予少
時因市得四書集咸闕鄉黨篇先生口誦子書之
已而得本較之不謬一字而取正居多其精博類
如此平生未嘗疾言遽色莊肅而和易學者嘗謂
如先生誠所謂恭而安者也所著文集凡若干皆
可傳之沒以洪武庚申年六十有八世爲吉水
螺陂人其先自文忠公之孫紹世得部符居吉水
解文毅公集

卷十三

九

積符至諱零者始家螺陂曾祖炎起宋進士新昭
州教授祖夢旗進士靖江軍節推父吾衡其墓在
龍塘山之原子仲訥孫忠孝少長余家今請爲銘
於其墓故叙次碑刻之銘曰

文忠餘慶河漢輸浸灌川陸草木蔞沃其根祇枝
扶踈文章懿行與之俱博學隱德伍櫟樗將施後
嗣仍環瑜不信請考太史書

時和曾先生墓誌銘

元主中朝自泰定天歷後文治聿彰四方典教諸
君子悉皆碩德宿儒先大父竹梧公與道益張先

生涖教吉水州學鼓舞作新一時文物蓬蓬然起
焉而時和曾先生以鄉進士除撫州學正繼視學
江州之德安贛州之信豐悉以躬行爲陶鑄凡所
相勗以道德相迪以文章猶先大父之於我吉也
國朝高皇帝崛起草澤首以學校爲務而費君震
李君恒相繼知州事以興學育材爲已任慕先生
之德邵年高復以禮聘爲本學司訓先君子筠澗
公與焉時縉在庠舍聽其講論得熏氣味知其淵
源有自來矣蓋先生系出名宗生近聖居平生積

德累學仕終教職莫究顯融然鬱積之厚慶流宜

解文毅公集

卷十三

二十

未艾云先生諱琦時和其字也其先武城族有諱
仁者徙居吉水儒學前爲古城始祖登宋咸淳進
士全州司理參軍古澗諱革先生曾祖也祖諱福
遠父粹中以書經中元泰定江西丙寅鄉試第一
諱迪先生仲兄天和也娶彭氏子二長伯謙次仲
誠早世孫三紹初用初顯初紹初由明經爲丞宣
城學道愛人無忝厥祖謂縉素習其爲人以狀求
爲之銘先生生元皇慶壬子八月十七之巳時歿
洪武丁丑十一月初十日之子時享年八十有六
葬四十四都片月形松山之原噫如先生者洵可

謂存順沒寧已余安能已於銘哉銘曰
生近聖居傳得其宗涖教諸州模範與同文興字
水古城之功仁山峩峩先生之風

徐學舉先生墓誌銘

宋亡元興吉水東門徐氏起家至萬石然本儒者
延賢先生業應進士舉過其門弦誦之聲未嘗絕
也富而不驕義而好禮由是部使者有旌門之舉
雖仕爲小官能有惠譽揭文安公以黃丞相擬之
者乎遠公也遇亂出軍需畫策與親戚舉義兵保
障水西者城南公兄弟平遠諸孫也予不及識之

解文毅公集

卷十三

五

見其與先公賡和詩有杜少陵之志而敬慕之者
爲城南公子學舉公公當國家隆平之會歸復故
居衣冠典刑柱石其宗者餘四十年一時學者欲
考見前代故家之風流皆從公質問焉而公樂以
告人忠厚明辨聽者莫不欣然有所得也予少時
先公奇愛之託公議婚公即云吾季女賢可以爲
婦且術者云必爲命婦遂許適余予自諸生致位
通顯待遇一如賓客之禮每送子別臨岐至江泝
舉酒寬慰祝願深情繼續在遠道數千里數寄書
問臨終猶屬其子孫致意於子於戲子別去纔歲

餘歸而公音容不可覩矣豈不悲哉公諱泰字子開學臯其號也母蕭氏早歿事繼母胡極其孝事兄極其謹兄卒撫猶子極其慈教子孫惟事詩書謹飭處鄉閭人服其公正歲時宴集家庭延接上賓連旬日夜達旦飲酒不亂醉猶恂恂然一談一笑皆中禮節真可謂之淳厚君子歟其家世本金陵予既序其家譜茲不贅述公娶曾氏蘭溪大族宋忠節公三聘諸孫曾必馨之女有賢行子三長亨字叔通次讓字叔遜季吉字叔迪女三長適積符朱廷綱次適夏璜劉汝瞻季適子孫男十公生

解文毅公集

卷十三

三

至正庚辰八月四日永樂己丑十月十七日卒享年七十將以庚寅十二月庚申日葬於所居鑑湖之西阡諸子泣請予銘銘曰

德內榮不求名既固既安惟永寧

劉君允中墓誌銘

劉守中河間人宋末陷於金天下重其醫術稱劉河間而不名其醫上與長沙相接下與鄆城爲宗鄆城得麻知幾爲作儒門事親書能發明河間之旨世皆喜傳之予嘗過鄆城求其遺跡訪其土人咸謂知幾能文然不甚知醫故其書多遺獨劉河

間自能著書若宜明直格之類行於世者甚多然
又皆非其奧也其子孫後遷江南必有得其傳者
予因記少時聞鄉先輩劉君允中有河間秘書從
其子曰升所借讀而歎之曰吾固謂河間當有秘
書喜其在是矣日升泣然以泣曰先子之所屬也
系本河間而莫詳其世數予以質之家君曰有之
初允中之祖芳茂自河間徙居江州宋季達泉梁
先生以醫游江州義同倫合與俱歸吉水焉芳茂
生德榮榮生子七人其季即允中自幼淳厚寡言
恪然忠信撫孤濟貧不爲德色至元中爲吉水醫

學教授壬辰之亂遇賊於鄉刃既及之有數人大
呼而前曰是真善人何可殺也所至得免盜不忍
害論其學行益無愧於河間者也予竊識之允中
入國朝醫術尤振治無不愈不獲迎至以爲枉死
連郡人敬信之車輿騎從絡繹不以早夜絕其門
尤通習地理百家之言不自炫耀退然若不勝與
人言如恐傷之生於延祐甲寅十一月二十六日
沒以洪武癸亥四月八日配毛氏子方升醫有名
江淮間先卒繼李氏有家法亦習於醫子三長文
升次復升日升其季也君沒時尚少能自力於學

後二十三年以書選入翰林始克狀其行請於予
曰知先人莫若君先大夫先大已矣得聞論說
宜莫如君子往年嘗欲輯次允中父子治病異效
事繼太史公淳于倉公傳因循弗果爲今亦未暇
細也姑就其所聞大略爲之銘曰

昔在河間卓哉守貞著書傳述千載一人孫在江
南書傳允中謂藥非補而惟主攻去病而已百發
百中譬之用兵豈必持重我欲傳之著其治功後
有作者其書可宗

趙君用哲墓誌銘

解文毅公集

卷十三

古

君諱哲字用哲宋宗室不佞從高宗南渡官至提
舉封吉水縣子因家焉後五世至必聖宋進士僉
書吉州判官聽公事元以爲西會尹不拜公高祖
也曾祖啟元祖叔順父存誠君生而敏穎不爲嬉
戲稍長益務學好讀書寒暑忘倦詩詞出語驚人
時學闕弟子員縣官聞其賢欲躬致之君之父亦
慨然曰當使之立功繼前光遂入學名譽日起從
子章劉先生治書經先生極口稱道之同門之士
皆自以爲不及也洪武丙子中江西鄉試進士舉
明年會試得乙榜時川蜀以學官闕聞太祖諭吏

部慎選江西人士爲之遂覆試君得夔之梁山教諭梁山僻縣學久廢君興廢舉敗陶頑鑄鑿翕然遂與赤縣等人皆悅之丁內艱歸鄉生徒送之皆垂涕泣居喪無違禮服闋調廣之徐聞教諭其教化益盛於梁山明年今上龍飛君朝於京師京師名卿貴人爭欲薦君君力辭曰教官吾素志也事君以身不若事君以人吾多育賢才以爲國用顧不可耶遂不敢強歸至徐聞以疾卒語不及私但謂弟謀曰恨無以養老親志年纔三十三君生洪武壬子沒以永樂甲申明年乙酉謀始奉君之柩

歸葬於鄉水磨坑之原母某氏娶龍氏無子子表弟翰林檢討劉君宗平與君同貢又同官蜀中少同事劉先生知君最詳乃述狀求爲之銘狀稱君有智略善談論美姿儀鬚鬢郁然事親以孝聞尤善教其弟兄弟怡怡如也內睦九族庭無間言輕財重義喜周給其於友朋藹藹如也既沒之明年朝臣尚有交薦之者部符下而君卒矣宗平所爲狀如此皆得其實云銘曰

宜壽而夭宜嗣而無後老父白首扶行送柩九族哀傷士林相弔嗚呼無所歸咎

劉君象賢墓誌銘

元季之亂大家世族能卓然不爲亂賊所污保其家復其盛昌其後者江鄉甚不多見也予嘗聞之夏璜劉君象賢兄弟首謀夜之吉安城報官軍掩取賊巢穴事泄官軍竟不至舉宗爲賊所屠亦皆不屈君與妻子幸走免賊平迺歸鄉治生築居教子孫復其舊規其艱難轉徙有人所不能堪者焉先是賊首欲釣引劉氏相表裏作亂遣人致意使當時一聽許寧不能免屠害與艱難轉徙哉君憤然罵曰所以爲世家大族以其守禮義也予家在

解文毅公集

卷十三

三

宋仕吉水縣簿宋亡與信國文公百戰守死以抗元師終不爲屈至元雖乏顯仕然父祖以上感其恩澤亦百餘年豈可伍梟獍爲厲階耶若義舉無成雖受賊禍亦不辱先人之志矣不然何顏復見家廟乎予深感其義歸以其事與語告太夫人太夫人曰外大父灞雪高先生官平江在元盛時象賢其季壻也來平江未嘗逐游事聲色侈靡其家教素嚴外大父每稱道之不置又聞之先君子云夏璜劉氏世本安福治尚書有名象賢大父諸父昆弟每過從談論其學問淵源非泛泛然比也由

是常喜從君問昔時事與之言歷歷未嘗厭焉後
子忝科第歸自翰林往拜謁之君爲之喜甚與飲
酒日夜具道外大父遺訓命其子汝哲與遊觀山
水間指外大父所爲卜葬其祖墓而爲道其所以
然見前人之游藝罔不造其妙而君平生坦夷豈
弟愛人樂善敦尚詩禮其得於家庭親戚爲尤至
也又往年予兄大經授徒夏瓊君實爲之主汝哲
親授業焉君朝夕所以與予兄講論多矣是予兄
弟皆有所聞於君也君之喪也在洪武辛未三月
九日子時寓京師後歸鄉君墓有宿草汝哲屢以

解文毅公集

卷十三

七

銘請始克爲之君諱崇字德象象賢其號也族有
譜予嘗爲之序曾祖時可祖至德父則賢母龐氏
娶高氏再娶蕭氏子男三人汝霖汝哲汝完女二
人孫男六君生大定丁卯四月十三得年六十五
墓在鄉東坑之原銘曰
守義不辱光明正直學問淳良家庭親戚平生之
言可裨世教有銘可鐫有子能孝

黃君仲簡墓誌銘

黃君仲簡既沒之十年其女大龐振舒應詔來京
師奉前陳州守李君子儀所爲狀請予銘其墓予

兄大紀與徐君叔通交口稱譽歎息謂宜爲銘其
凡知仲簡者皆言其磊落可喜而悲思之嗚呼去
之十年而人尚不忘與其在世無異則其在世豈
無制作過人者歟按狀先世某既沒家亦中廢崎
嶇多難君理其先業而充廣之及有贏財輒斥以
起其廢其鄉官陂之橋圯具斲與石要道士彭一
寧董其役橋成而行者以便楓子江當二水之交
朝涉者或致沒溺置船而濟者以喜林木陂溉田
數千畝復之而歲以無旱隣里有貧民每春夏農
事急無所仰食輒貸之穀而未嘗取其息爲家塾

解文毅公集

卷十三

三

延良先生教其子弟治家嚴而有法事兄恭而有
禮友愛諸弟撫育孤甥勤勤懇懇尤喜賓客四方
游士過其門禮接之如將不及蓋久而未嘗厭當
其廣席酒酣抵掌論事豪氣橫放殊磊落可喜也
狀所稱者蓋如此憶余少時嘗與君游登山臨水
縱觀闡閱之間爲言其生平志意浩歌擊節當世
人可其意者殊少也又謂古之人遠者姑勿論近
自元季耽溺宴安俗尚柔弱鄉里富豪家士人乎
驟聞金革之聲手足振掉目眩眩耳不聽坐而待
斃妻子爲虜可憫不足恤者何限我先人誓天仗

義鳩集義旅盜賊莫敢犯吾鄉迄爲保障以迓治
平至今室房有故宇圖書有故藏里人無流離之
苦田野無荒棄之時山林無斬楮之虐一草一木
之遺皆先人之遺澤也我恨當其時尚幼日習馬
不能助我先人建勲業先人亦賫志以歿此古
英雄奇偉之士所以汨沒而無聞者類如此也審
其言固侷儻可喜夷考其任事馭衆低昂有度權
正合宜人皆畏之因其小者大者可知或時以泄
其憤披甲橫矛彎弧突騎獵逐平原曠野之中望
之偉然文武可用亦庶幾奇男子世豈多有哉於
解文毅公集

卷十三

元

戲是安得不久而想見之尚如畫也哉君諱敬號
竹澗高祖顯民始家於吉水曾祖端叔躍淵其先
人也君生至正乙酉七月初二日以洪武乙亥閏
九月十三日沒於京師年五十有一歸其喪者季
弟禮與壻朱正也娶周氏里之名家子男四人復
安既安居安太安女三人有陳彥素者亦其壻墓
在其鄉鷓鴣山之原銘曰

憶慨慷言可績才可惜金利不矛戟鎮粟不爲璧
水秘茲石

徐君耕樂墓誌銘

洪武戊午太學生徐均仕爲肇慶府陽春縣主簿
陽春故春州也瘴癘毒霧聞者惴慄每使者當按
行託故避去由是驟豪得雄據爲姦利縣官至受
顧指少忤觸之輒死前後莫敢忤受顧指幸滿考
捆載去均廉知之至縣吏白應往視莫大老叱曰
何物大老復白此洞主老病家居宜就見叱曰若
化外抑民伍也亟走來見不然且奉國憲正法出
雙劍示之大老聞恐懼乘板輿至叱使下拜不得
已蒲伏熟視諭遣之即伺其語有異而府符下問
之遂繫之獄均曰是其人必且來劫獄戒吏士操

鼓角柵其私衙自帶劍挾弓矢披甲長嘯大老三
子果各將其衆來聞之皆帽莫敢前詰朝昇兩大
瓜安石榴十數枚致饋皆黃金大珠也均不一視
即麾出械繫大老身送之府中後府官竟受賕大
老脫歸數致前所饋均一再拒之發怒欲捕治大
老震慄求府符調均攝陽江縣陽江亦治服而均
丁母憂去此史氏之文也徐吉州大族南唐中書
侍郎上饒郡公遜之後曾祖林隱先生先公外大
父也祖本仁父仕麒母姜氏其遇元季之亂年纔
十三先公時在太學先祖死節仕麒孳子兩家避

難崎嶇二十年經紀扶持克復安業皆其父子
是以知之尤悉子畊其字畊樂號也其少時聰敏
十五六歲僑居授徒志行卓然從勤窓王先生治
尚書離亂中成學黃霸夏侯勝事何以過哉國初
爲縣學生卒業先公之門洪武乙卯貢太學試中
書御史堦入高等分教山西夏縣後官會同謝事
家居以壽終其事親事師誠懇篤摯古賢人不能
過也享年五十九配王氏子男二人壽今爲工部
主事光邑庠生女三人適姜某胡某蕭某其墓在
古查坑之原銘曰

解文毅公集

卷十三

三

士行全勒銘堅千萬年廉潔徐君之古墳

周吾文墓誌銘

於戲子二十餘年見周氏祖子孫三世讀子家書
見余從祖父及先君子先叔父之文爲周氏作者
亦多有之而其家字吾文者先君嘗謂子曰善承
其父志其父宗祥其季父宗瑞兄弟以友愛稱人
謂宗祥仁兄宗瑞悌弟吾文令子余少皆不及拜
其門而識之子家塾間宗祥兄弟之墓皆余爲文
刻石識之而吾文之子宜哲復以翰林蕭君引高
所爲吾文行狀請余誌其墓而爲之銘安得不重

爲感慨歟按狀吾文諱琛兒時穎悟好書太父本
立長者有智鑑嘗曰此奇兒也必興吾家出入與
俱設疑難令剖決出人意表及理家事井井就緒
如老成人元季之亂佐其父舉義兵保障鄉里攘
斥羣寇禮下賓客撫納流亡所存活甚衆以功陞
吉水州判官家吉水之醪橋市人共榮之已而內
附從鄂國常公攻下贛州陞吉水州同知而祖母
鄴氏卒因謝病免散其兵爲農事事親極孝養歲
時宴集賓客之盛輿馬照映固已下視陳孟公之
流其一門四世同產合食庭無間言雖古稱義門
無以過之也於戲使吾文父子至今猶在也豈不
成就爲鄉之模範歟於戲惜哉其生時秦定戊辰
歿以庚辰葬於鄉草子山之原母陳氏妻陳氏子
男三人宜大宜民宜哲也銘曰

有美哲人温其如玉山輝晴霞風采濃郁早知學
問親師擇友義勇英謀志殲羣醜時智時愚時止
時仕人謂松雲不斥其字德惠鄉閭慶流孫子百
世之下佳城鬱蔥讀茲有感尚想英風

江孔殷墓誌銘

嗚呼孔殷舍我而遽死耶今欲爲汝墓銘執筆鳴

咽欲下復止者數矣不知泣涕橫流而與筆俱墮也嗚呼何其哀之至耶嗚呼予嘗恃汝以爲身後之託而反執筆以銘爾墓耶又嘗恍然而自語曰豈夢寐耶而今汝真死矣幾將一年青燈逆旅叙平生之事而爲之銘憶孔殷年十餘歲時避仇鄉之夏璜予讀書東溪彭氏童奴負之過盧原嶺始教之學其時已穎敏過人爲編次杜詩作字端謹動止循良子方學舉子業每坐達旦輒從旁注視稍能通大意予甚竒愛之後數年予舉進士得官侍親還家始務爲古文辭又嘗坐達旦獨孔殷與解文毅公集

卷十三

三

俱雖動靜言笑無不視予所爲者予又勉之曰求之古人我何足學其所爲書札經義皆與子亂真予久自不能辨也其家世名儒南唐末諱某者知吉水縣因家焉世承饒裕幾甲一鄉然觀其意則一毫不以動心而專力於學其勤又甚似予也去鄉而學遂成聞其舉進士京師會試中居前列入對大廷聖天子遣中使視之錄其文以進文武羣臣合口一辭皆謂其當第一既拆名乃第五物論殊以爲屈而孔殷欣然稱已過分會有詔賜還鄉里孔殷爲廷臣所舉留不得去入與纂修攷攷不

急得疾旅舍予以事冗不得早夜視之以爲至恨
但少間時得一會語不及私不數日竟死嗚呼其
爲痛宜何如也將殮予視之猶見其血泪相和以
流予兄大紀與弟淳夫往殯之城南之鳳臺里將
以某月日歸葬其家世與予有連曾祖崇德龍泉
教諭祖仲溫父彥政母劉氏劉氏之母先太夫人
同產也其母早亡太夫人視猶已女而江氏於予
家比隣兩家往來甚密仲溫之死也因哭先君子
卧病歲餘余歸自京師方疾起予坐語移日不數
日遂卒臨終但語孔殷以力學大其家可謂光榮
如其志矣而竟止於是耶其配王氏有子一名彞
銘曰

解文毅公集

卷十三

雷

先嫂歐陽夫人墓誌銘

夫人歐陽氏宋名臣文忠公之後自穎復居於吉
水之迹符有諱芝者爲螺陂蕭氏壻始居螺陂生
炎起寶祐元年進士教授新昭州與余家有連六
世祖上猶府君之葬也實爲之誌炎起生夢旗咸
淳四年進士甲科爲靖江軍節度推官不仕有文

學兼通於醫用以濟人子衡字師尹至正庚寅鄉
貢學者稱莘芸先生夫人之父也余少時讀先祖
墓誌已知慕昭州公而莘芸先生又家君莫逆也
嘗受聘迎為考試官與家君同被徵起同得辭謝
故戶部尚書費公震初知吉水以家君二人者之
相善謂宜相與為婚姻故夫人歸於我家兄時洪
武丙辰余未成童然喜為文字先生至予舍輒從
問經史大義先生甚喜諄懇教誨歷年訓詁不遺
餘說每至夜分夫人具燭火為酒食湯茗未嘗敢
言倦家君性嚴重治家剛明有法度雖臧獲不能
解文毅公集

卷十三

三

一出語違義禮外親子侄至不敢仰視夫人溫然
不怒而整服於禮法家人輩稍有乖違略顧視其
容辭自不勝其愧者余兄弟亦素剛明余少尤明
察人難當其意者夫人歸於家三十年中間從余
兄官京師歸葬二親葬歐陽氏三喪其兄早卒經
紀其家撫其餘孤家君及太夫人在時稱其善綜
理予兄於家事悉以付之無違其意者見予之幼
而長仕而顯學而有文章致其意請銘其父母之
墓其子禎期今年來京師受主上眷知以書學選
為天下第一人被特恩習書策東宮將迎致之而

夫人卒於家可哀也已夫人諱晚字季晚生至正
辛丑六月十一日午時沒以永樂乙酉六月十二
日午時年纔四十有五母鄧氏宋嘉定進士提刑
剛之後余家鴈門解氏自唐世家於吉余兄綸字
大經與予同登洪武戊辰進士第太夫人高氏唐
南平王崇文之後元至正辛酉進士贈中書平章
灞雪先生之女夫人之歸於我家年尚少凡女工
織繡治饋之事無不循習皆太夫人教之也子男
一人字禎期女七人長適東螺彭懷次適螺陂蕭
肇敏次適周光華次許適夏璜劉某節幼在室孫
解文毅公集 卷一 二 三六
男二人榮祿榮宗女孫一人輝真夫人之葬在中
鵠鄉五十二都東螺乙辰山戊辛向其銘曰
漢有星兮粲七襄孰殞質兮無遺光勒銘辭兮示
廟藏



